



EDURNE KOCH

**Espainiako Armadaren 'Juan Sebastian Elcano' ontzia Getariara etortzearen aurka.** Datorren asteazkenean, Espainiako Armadaren *Juan Sebastian Elcano* ontzia Gipuzkoako Getariara etortzekoa dela salatu zuen atzo Herri Batasunak, herriko plazan, prentsaurrekoan. Getariako Club Nauticoren jokaera salatu zuten, klubaren 50. urteurrena ospatzeko «herri hau zapaldu beste helbururik ez duen Armadari» gonbita egin diolako. Etorreraren aurka mobilizazioak egingo dituztela iragarri zuten: besteak beste, kontzentrazioa egingo dute, kaian, ontzi militarra Getariara etorriko den egunean (asteazkena), goizeko 10:30etan.

## Bederatzi lagun atxilotu dituzte Bizkaian eta Gipuzkoan, drogarekin trafikatzeari leporatuta

*Ertzaintzak kokaina, haxixa, droga nahasteko tresnak eta autoak atzeman ditu*

Erredakzioa / Donostia

◀ **Ertzaintzak bederatzi lagun atxilotu zituen ostiralean Ermuan, Eibarren eta Elgetan, drogarekin trafikatzaren zuten talde antolatutako kideak izateaz akusatuta. Droga, autoak, dirua eta drogak nahasteko tresnak ere atzeman zituen Ertzaintzak. Polizia Autonomikoa ez du daturik eman nahi izan, sumarioa sekretua delako.**

ATXILOTUTAKO bederatzi lagunei (zazpi gizon eta bi

emakume) 600 gramo kokaina nahasi gabe, 200 gramo kokaina nahasi eta 300 gramo haxixa atzeman zituzten. Horrez gain, hiru milioi peze (120.000 libera), pistola bat, ordenagailu bat, matrikula faltsuak, hamabi bat auto, patrikako telefonoak eta drogak nahasteko tresnak ere aurkitu zituzten atxilotetako egin zituzten herrietan.

*Deia* egunkariak eman zuten atzo operazioaren berri, baina Ertzaintzak ez zuten informazio gehiago eman nahi izan, sumarioa sekretua delako.

Operazioan atxilotuez gain, beste pertsona bat ere ba omen da talde antolatutako horretako kide, baina alde egitea lortu du. Hala ere, Ertzaintzak espero du hurrengo egunetan hura ere atxilotzea, operazioa guztiz ixteko.

### Ondarroan hasitako ikerketaren emaitza

Talde horren kontrako operazioa duela zenbait hilabete hasi zen, Ondarroan. Bizkaiko herri horretako Ertzaintza ohartu zen purutasun handiko kokaina kontsumitzen ari

zela herrian, eta ondorioz hasi zuten ikerketa.

Operazioan parte hartu dute, Ondarroako ertzainez gain, Bergara, Azkoitia eta Eibarko komisarietako eta Brigada Mugikorreko agenteek.

Atxilotutakoetatik bik bakarrik zuten lan finkoa. Iturri beren arabera, taldea gidatzen zuten pertsonak duela gutxi erosi zuten baserri bat Elgetako Karabietas auzoan, eta baserri horretan jarri zuten droga nahasteko tailerra. Gainera, etxeko garajearen 12 auto atzeman zituzten, denak ere atearren sarraila manipulatu zutenak.

### laburrean

#### ■ Inolako eraginik gabeko lurrikara izan da Ollolaldean

RICHTER eskalan 2.6 graduko indarra izan zuen lurrikara bat izan zen atzo Nafarroan. Epizentroa Ollolalde herriaren hegoaldean kokatu zuten Institutu Geografikokoek, baina, SOS Nafarroak adierazi zuenez, Zirizako biztanle batzuek bakarrik deitu zuten larrialdietarako 112 telefono zenbakira, ezta moduko zarata bortitza bat entzun zutela eta. Lurrikarak ez zuten, dena den, inolako kalterik eragin, ez pertsonengan eta ez herri horietako etxebizitzetan. Atzokoa ez da aurtun Nafarroan gertatutako lehen lurrikara, otsailaren Luzaiden 3.5 graduko bat izan baitzen. Iaz ere, beste lurrikara bat izan zen, eta Gipuzkoan eta Bizkaian ere sumatu zuten.

#### ■ Milaka tona hornigai helduko da gaur MIR estaziora, dena ondo badoa

MIR estaziora bidean dira milaka tona hornigai, Progres M-42 ontzi espazialean. Dena ondo badoa, gaur iritsiko da ontzi hori MIR estaziora. Hain zuzen ere, ontzian doazen hornigaiak dira estazioak behar dituen guztiak, espazioan egon ahal izateko 2000. urtean lurrera itzuli arte. Gaur egokituko dute Progres ontzia, eta operazio horrek arrisku handia du. Hain zuzen ere, 1997ko ekainean gertatu zen MIR estazioan orain arte izandako istripurik larriena, antzeko operazio bat egi-tean. Hala ere, orain sistema berri bat egokitu dute, *Tory* izenekoa, eta horrela arriskua ez da hain handia izango, adituek diote-nez.

#### ■ Pentsio batetik etxe barruko patiora erorita, oso larri zauritu da estatu batuar bat

E.J.J., 29 urteko estatu batuarra, oso larri zauritu da Donostian, logela bateko leihotik barruko patio-ra erorita. Arantzazuko Amaren ospitalera eraman behar izan zuten, buruan kolpe oso larria zuela. Istripua goizeko sei eta erdiak aldera gertatu zen, ez jakin nola, Gipuzkoako hiriburuko Parte Zaharreko etxe batean. Gizona suhiltzaileek atara behar izan zuten patiotik.